

**■ COLUMNA**

# Origen u olimpia?

DA JOST FALETT

La taxa turistica è giu da maisa – la via è libra per la discussiun dad Olimpia 2022. E quella è gia intensiva, cun raschun: I sa tracta da blers milliuns e milliardas.

Cumanzà han ils custs per la candidatura cun 36 milliuns – ussan nus tar 60 milliuns. Il cussegl grond duai decider da 300 milliuns per realisar ils gieus. Era quels na tanschan betg. Cusseglia governativ Trachsel discurregia da 370 milliuns – e quai tar deficits annuals prevesids da sur 100 milliuns per ils proxims onns en la cassa da noss chantun. Da la confederaziun han ils promoturs dad Olimpia 2022 giavischà in credit da 1,3 milliardas. Il cussegl federal propona dentant al parlament mo 1 milliarda. Ils promoturs ston damai spargnar 300 milliuns. Plinavant scriva il cussegl federal che el retiria il sustegn per Olimpia 2022 sch'i sa mussa che 1 milliarda na basta betg. Dapi 1960 han ils gieus olimpics adina surpassà il budget, per il solit massivamain. Perquai prenda l'IOC ina garanzia da deficit dal stadi che ha ils gieus. Tgi dat ussa quella?

Che il Grischun viva fermamain dal turissem n'è betg da dubitar. La dumonda è dentant, co che nus vulain promover quel: cun in project schmasirà



per las duas destinaziuns turisticas che èn gia enconuschentas en tut il mund u cun projects locals en l'entir chantun. Lillehammer ha realisà parallel cun ils gieus olimpics per 2% dals custs projects regionalis. E l'effect da quels è sta en congual bler pli grond. Tant Richard Kämpf, directur da la sezziun turissem dal Seco (secretariat statal per l'economia) sco l'antier professor da turissem Hansruedi Müller din che effects economics a lunga vista tras gieus olimpics na sajan betg da cumprovar. E schizunt Marco Salvi da Avenir Suisse – che sa definescha sco organisaziun che s'orientescha al martgà ed ad ideas liberalas – è sceptic pertutgant las prognosas economicas e di che pli important fissia ina clera analisa che mussia tgi che paja quant e tgi che gudogna.

Co duain las regiuns pli periferas da San Murezzan e Tavau sco Mustér u la Val Müstair profitar

dad Olimpia? Ellas pon il pli da tut perder: Sche la reclama dals gieus funcziunna pon ellas perder giasts a quellas regiuns, ed en mintga cas mauncan suentar ils gieus ils raps per projects regionalis. I dat avunda exempels documentads co ch'i è stat da spargnar suentar ils gieus. Albertville (1992) ha amortisà l'on passà las davosas infrastructuras olimpicas. Ils debits èn en mintga cas durabels.

En Grischun avain nus favunda buns projects degns da noss sustegn, projects che stimuleschan fermamain il turissem en nossas valladas. Per numnar be in exempel: Dacurt avain nus legi da las difficultads finanzialas da Origen. Quest project naschì en Surses che sa preschenta cun in program excellent en tut il chantun e porscha ad indigens e giasts cultura sin aut nivel, e che fa cun sias representaziuns giu la Bassa meglra reclama per noss chantun. N'èsi betg da's turpegiar per nus Grischuns, che Origen na sa gnanca pajar ses intendant? Ed anc pli inquietant: che Origen sto chalar sch'i na dat betg dapli sustegn dal chantun. Quant giess a perder per il Grischun – ina promoziun turistica da prima classa mancass.

Damai: Il titel da questa columna n'è betg exagerà – el è malavita zunt realistic!